



STAVOVI Perica Stanić, novoimenovani direktor SIPA-e, za „Avaz“ Terorizmu i kriminalu suprotstaviti se svim raspoloživim sredstvima

S obzirom na posljedice koje izaziva, i mi moramo uvijek jačati intenzitet te borbe, kaže Stanić

Perica Stanić, novoimenovani direktor Državne agencije za istrage i zaštitu, jučer je za „Dnevni avaz“ kazao da će već polovinom naredne sedmice preuzeti novu dužnost. Do tada će se i zvanično oprostiti od dosadašnje funkcije savjetnika direktora Policijske RS. Stanić na čelo SIPA-e dolazi sa skoro 25-godišnjim iskustvom rada u policijskim strukturama, a najnovija dužnost za njega je, kako i sam kaže, kruna dosadašnjeg rada, ali i veliki profesionalni izazov

Velika obaveza

- Istovremeno je to za mene velika obaveza i odgovornost koje sam se ja spreman prihvatiti, jer da nije tako, ne bih se ni kandidirao za tu poziciju. Ono što u ovom trenutku mogu obećati jeste da ću svoj posao raditi profesionalno i zakonito. Nadam se i da ću imati dobru saradnju s ljudima koji već rade u SIPA-i - kaže Stanić.

Iako ga tek očekuje zvanično preuzimanje funkcije direktora SIPA-e, Sta-

nić ocjenjuje da ta policijska agencija ima sve potrebne kapacitete za kvalitetno obavljanje poslova iz svoje nadležnosti, ali smatra i da se uvijek može više i bolje. Naročito u kontekstu zadataka koje Stanić smatra prioritarnim.



Stanić: Važna saradnja s Tužilaštvom BiH

Dvosmjerna saradnja

Stanić naglašava da će tokom rukovođenja SIPA-om posebno voditi računa i o saradnji sa svim drugim policijskim i sigurnosnim agencijama u BiH, bez obzira na to što se njihove nadležnosti razlikuju.

- Jer, u ovom slučaju saradnja ne samo da je bitna nego je preduslov za efikasan rad svih policijskih agencija u BiH. Ne

smatram da SIPA treba biti neko izdvojeno strano tijelo iako djelimično MUP-ovi imaju nešto drugačiju nadležnost, dok SIPA radi samo na djelima iz nadležnosti Suda i Tužilaštva BiH. Možda je po tom specifična, ali saradnja s drugim agencijama mora biti dvosmjerna i bez ikakve zadržke i zadnje namjere - ističe Stanić.

- Borba protiv terorizma svakako je prioritet. Terorizam se nametnuo kao pošast savremenog svijeta s obzirom na posljedice koje izaziva i mi moramo uvijek jačati intenzitet te borbe. Smatram da svugdje, pa tako i u

SIPA-i, uvijek ima prostora da se stvari poprave i da budu bolje, pogotovo jer je

taj imidž agencije u jednom periodu bio narušen. Svakako da su među prioritetima i borba protiv organiziranog kriminala, kojem se, također, moramo suprotstaviti svim raspoloživim sredstvima - naglašava Stanić.

Optimistične najave

U tom pravcu, ističe Stanić, naročito je važna saradnja s Tužilaštvom BiH, ali i s drugim nadležnim institucijama u zemlji.

- Mi ne možemo bez saradnje prvenstveno s Tužilaštvom BiH i s moje strane će ona biti bezrezervna, bez zadržke i na najvišem nivou. Ne tvrdim da te saradnje i sada nema, ali kažem da ću učiniti sve da ona bude bolja i dostigne bolji nivo - optimistično najavljuje novoimenovani direktor SIPA-e.

S. DEGIRMENDŽIĆ